



Homo Stupidus Helveticus – mir verbleede

Wir wollen sein ein einzig Volk von Blöden
in keiner Not uns bilden – und Gefahr.
Wir wollen über unsere Väter schnöden,
die damals klug noch waren. Gott bewahr!
Eher den Tod als das Gehirn einschalten.
Nur iPod, Glanz und Glitzer sollen uns erhalten.

So haisst jetz der hittigi Rütlichwur,
das isch unseri neyschti Schwyzer Natur.
Statt Mälchtal und Fürscht,
nur Chips, Bier und Würscht.
So bleed wänn mir sy - und do simmer stur.

In de Schuele steerts au scho lang nimme,
wenn fascht alli bym Lääse dien schwimme.
Kompetänz isch hitt gfrogt,
drum wird kaine me blogt -
Will me d'Juuged zem Nit-Dängge trimme?

Statt dr Gaischt interessiert nur no s'Gäld.
Ohni Dängge kunnsch beschtens dur d'Wält.
Isch dy Hirni au waich,
intellel ganz im Saich,
lueg in «Blick» und scho wirsch du erhält.

Jä, d'Verbleedig isch laider scho wyt,
gsehsch's bym Färnseh zue jeedere Zyt.
Blöff, Bleedsinn und Gaga
Iberrollt di näbscht Blabla,
und unterem Strich bringt's dir nyt.

In dr Baiz liis i als d'Menükarte,
doch verstand i si nit, usser Schwarte-
maage, Bier und Kakau
und Tirami-Sau,
well uf d'Rächtschryybig muess i no warte.

By dr Yysehahnbrugg an dr Aare
gsehsch du Pokemonjäger in Schaare.
Sii sueche s'Evoli
fir dr Pokemonzolli
- und wärde vom Zug yyberfahre!

Scho syt langem verkunnt unsere Staat
fir dr Birger zem Zwangsapparat.
Was immer du wotsch,
du fühlst di als Dotsch.
Das verstimmt aim und macht rabiat.

Uns gruust's jedes Mool vor de Wahle,
scho bim Draadängge lyyde mir Quale.
Kandidate-Versprüche
sin do, fir si z'bräche,
und d'Zäche darf s'Volgg denne zahle.

Au d'Kultur isch vo Schade betroffe:
Isch e Kinschtler verlaade und bsoffe
und sy Opus au myys,
griegt äär doch no-n-e Bryys.
Qualität kasch hitt nimme erhoffe.

Im Theater gsehsch du dr erscht Aggt,
wo dir gfallt und womeeglig au paggt.
Aber denn wird's vertraggt
und völlig abgschmaggt,
bis dr Oobe im Schwachsinn versaggt.

Mir mache vyyl z'vyyl bleedi Pflänz,
s'fählt an Wyysheit und Intelligänz.
Kamel, Esel und Aff
beehre drum taff
unsri Fasnacht mit ihrer Bresänz.

E Neyaaafang – dasch d'Konsequänz

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne
sin vom Määntig znacht bis am Mittwuch demoorge!
Deert und an de 3 Verkaufsständ (CINS) in dr Stadt ka
men au alli Zeedel und Schnitzelbängg, d Blaggedde
und dr Rädabäng kaufe.

Am Fritig und Samschtig, 10. und 11. März 2017
isch Noochwuggswärbig vo dr 1. Lektion
im Zält uff em Barfi.

D'Zeedelläasete isch am Sunntig noo dr Fasnacht
2017 am 12. Meerz vom Fimfi bis am Siiben
zoobe, in dr Baseldytschi Bihni (im Lohnhof).
Dr Ytritt isch vergäabe. D Foyer-Bar isch
vom Vieri ewägg offe.